

范香溪先生文集

239350



239350

~~112001~~

范香溪先生文集卷之七

姑蘇臺賦

辛丑年作

歲崢嶸其聿邁兮冬隆寒老訪蘇臺之遺址兮遵吳
都之古道日下平林烟橫衰草慨傷時而感往增予
心之惓惓念昔吳王盤游怠荒次陂池兮臺榭宿嬪
妃兮御嬙雖生人已困於頽尾而土木之工未央於
是越人仇之冬冰是棲蠡也決策種焉建竒蓋君臣
鳴鍾而謀于漸臺者窮日夜而吳初不知種有九術
越行其一取文梓榿楠以奉吳王之宮室吳乃營茲
榮臺歷三年兮聚材斧集刃兮疊雪杵攢林兮殷雷



金碧恣撩琳珉城階巖巍今嶢峴干霄兮切霓佩長
洲兮茂苑帶朝夕兮濬池意將遠眺數百里而下窺
雲海之涯當其虐用吾民骸體莽暴蒲木切天厭其酷
故啓越之謀而夜生神木人罹其毒故勞愁慘悽而
塗嗟巷哭使臺土未乾兮已羣游乎麋鹿至若朝歌
淫淫夕管悖悖困醪醴之酣沈則有西施蠱其心是
助越人之侵又若姦讒回沈膏唇鼓舌吠正人而媒
孽則有宰嚭間其說是誨越人之伐嗟乎吳王知西
施之姝而不知宰嚭之諫知歌管之娛而不知吳民
之痛知華其居而不知其國之墟知勾踐之為奴而

不知身之為獨夫信茲臺也實亡吳之權輿吁

述嚴賦 并序

後嚴子陵千有餘歲蘭谿范浚過祠下仰瞻遺像
惕焉景慕謂先生之不屈于建武非若踰垣閉關
為已甚者揆其意而著之作述嚴賦

歲辛丑予東歸兮凌濤江之渺瀰引帆席而朝發兮
夕予次乎嚴君之祠惕仰高其若存兮揆厥意而明
之曰先生之遭世兮會炎正之中微慘餘分之孽虐
兮方悖道而窮威率誅忠而任殘兮紛赤車之四馳
蕩三綱其弛絕兮誰不裂冠而去之宜先生之高蹈

兮靜游釣於淪漪逮赤伏之膺運兮矯白水之龍飛
彼羣雄之疏附兮猶響臻而應期何故人之雅素兮
翻固拒而牢辭惟先生之高介兮氣干霄而上躋恥
一毫之或挫兮若撻市之忸怩彼君房獨何人兮將
使我自屈而詭隨荃不察予之口授兮顧狂奴之是
譏視蒲車之來思兮類被毀而遭非謬儒仲之耿耿
兮繫俗黨之貽訾伯况願修於初服兮幾偃蹇而見
擠旣讒巧之孔多兮予又胡爲乎遭迴寧超超以遐
逝兮亦安能依世而突梯意先生之達識兮不降志
其由茲吁嗟器大時難容兮追巢躡由邈儷蹤兮水

之渾渾山崇崇兮遺芳不泯名益隆兮何千萬年激
頽風兮死者如可作惟先生之宗兮

過莊賦

并序

莊生有言大塊載我以形勞我以生佚我以老息
我以死世誦其說予獨以爲妄辯作過莊賦

大塊載我以形稟我以性目吾使之視耳吾使之聽
言以捺吾意思以達吾情我飢我渴與以飲食我作
我息詔以晨暝使我從容乎事物之間而不失其正
天於人爲至厚稽諸身而可證何生之勞可爲吾病
何必老而後佚何必死而後靜苟達觀於一致何在

亡之足評豈有身則為患豈身殞則為勝顧真我之
為我匪形生而氣孕曾無象以獨立緊常存而靡竟
歷千變與萬化每自如而安定彼從壯而得老此何
衰而何盛彼從老而得死此何損而何騰鑿至理而
妄辯實莊生之未聖若予者則為如何邈與世其無
競蓬茅一室松菊三徑林嶺泉石娛吾游行風花雲
月供吾嘯詠無營無欲爰清爰靜隨所適而得此生
焉聊樂乎天命

登八詠樓賦

憑軒楹而寓目納萬景於遐荒窮烟鴻之滅沒辯雲

樹之微茫羣峰屹乎延連兮疑結根於台嶽兩溪浩
乎奔渾兮將走集於濤江俯萬落與千村鬱春靄之
蒼蒼林廬隱昧乎郊郭錯彩翠而相望繚蓑城之綿
聯帶碧水之灣汪搖晴陽而蕩漾射藻井而交光攬
山川之壯麗睨棟宇而相羊信茲樓之竒觀甲區中
而少雙山川兮如昨棟宇兮非昔閱古今於百代忽
白駒之過隙引玄酒之一酌弔隱侯之幽魄想悲桐
而憫草悵多違而撫臆豈當時之擯落亦擁節於侯
國顧人壽之幾何胡不怡而慘戚慕太白之來游嘗
坦腹而高眠雖身世之爛熳獨訪古而留連誇魏萬

之經行邈曠望乎羣川流宕堯之逸句凜生氣於千
年吁嗟乎懷古人兮眇眇倚飛欄而吟嘯惜此地之
勝賞復徘徊而臨眺見漁子之浮舟正擘餌以投釣
凌驚波之洶涌方危坐而獨笑見田翁之引犢出城
陰之落照雖市聲之合雜獨行歌而荷蓀悟物理之
一致得領略於無言苟吾心其專靜豈世故之能遷
彼沈郎之煩促真膏火之自煎信謫仙之曠達脫世
故之拘攣試寂默以冥觀泯萬慮於自然

慎術賦

人孰不良惟術也利人之傷則為豺為狼人孰不令

惟術也劫其正性則爲梟爲獍彼市矢工懼羽鏃無庸幸仇敵之交攻彼驚棺子懼禪傍積委冀市人之立死歲或大飢足穀者男歡而女怡蠶不三俯積帛者朝歌而暮舞癘疫興而國工捧腹零崇用而淫巫布武推類以言事胡不然習武者思亂好夸者盜權爭名者不得不賣友以自遂爭利者不得不排人而取先聚斂用則不得不爲桑羊爲孔僅法律進則不得不爲張湯爲臧宣子貢不得不亂五國以納說蘇秦不得不闢七雄而合連故曰術不可不慎也爾其戒旃

猩猩賦

以爲後而語惠以爲人而意愚嗜屐嗜酒以亡厥軀
終雖亡軀猶戒其初彼世之溺名淫利而不知省者
初寧戒乎噫猩猩之不如

甘菊賦

爾英之可藥兮將使人壽而不死因見髡於朱孺子
爾葉之可蔬兮將使人飢而得羹因見戮於天隨生
旣髡旣戮根莖瘁禿爾曾不如不材之木大爲槃癭
細爲卷曲永無濟世拯人之用兮迄天年於窮谷

蠓賦

橫行蠹稻雄稱鬪虎貪恠無厭化作田鼠吾將斫爾
螯折爾股以除農殃兮酣我醕

范香溪先生文集卷之七

范香溪先生文集卷之八

雜興五首

雉驕有擅澤雞雄亦專栖乘人肆桀傲未異雉與雞
虛張盡客氣不知隋危機雉驕或登俎雞雄亦爲犧
嗟爾桀傲子不戒將安之

荆梟昔見惡去楚將巢吳妖音不知革吳豈荆人殊
梟能戒頰舌勿復輕嗚呼雖荆亦容爾何必他邦居
高蟬蔭嘉木未省蟾斧危勇蟲亦何愚不顧黃雀飢
癡癡挾彈子已復露霑衣世事無不然古今同一悲
鵲噪得歡喜烏鳴得憎嗔烏鵲自有口噪鳴何預人

鳥飛聲啞啞鵲飛聲嘖嘖凡鳥從紛紛未用置肝鬲
彭亨着冠猪踉蹌上車鶴皇家一清明此輩束高閣
龍夔雜鷓鷯庶位已叅錯少安真可待四海得耕鑿
我亦幸豐年從容一止壑

遣興五首

商山園綺徒雪髮映松露山間謂終老不踏市朝路
一朝前星匿羽翼起調護婆娑古衣冠笑定國儲副
留侯計偶爾曷遽動貞素因知古今士出處自冥數
功名苟不免四老猶一助寧庸巧馳驅失爾邯鄲步
少陵古詩伯未必真豪人胡為冷炙辱自分潛悲辛

莫倚善題賦未悟嚴武嗔徒言磊落士不肯異其身
我逢劉穎川竟夕不向枕餘人偶對面白晝輒欲寢
生來不耐俗敢妄作題品猶嫌太分明客至姑與飲
龐眉困郎署白首命不遭猿臂無侯封徒負射虎豪
兩者阨天運材智俱莫逃向來鄧氏子志行劣可褒
藉非逢際會未免椽功曹

翻雲覆忽雨昨火今已冰三塗九州險未似今人情
人言餘耳事令我不忍聽嗟哉泝水上刎頸遂寒盟

題八馬圖

何年畫工搦毛錐貌此八馬姿權竒青絲絡頭十二

蹄調柔意態行愉怡五馬放浪無維羈或齧或望仍
迴嘶一牧牽鞚一牧騎製度髣髴唐巾衣不知此馬
生何時昔周穆王遠遊嬉駕跨八駿驅東西高升崑
崙躡瑤池騶駼驥義勞飛馳日走萬里無停駢興元
唐家危累綦百夸僅脫朱泚圍黃屋進狩懷光追八
馬入谷七馬疲筋攣肉綻行人悲兩者資世皆顛羸
虛名何有千載垂空得傳記流歌詩未如此馬閑猶
夷牧垆不受鞭笞威不踣險遠安無危泉甘草薦足
自肥安用號駿稱雲騅嗟哉畫意誰能知

寄謝潘舍人贈烏紗帽

野人儀矩初無華况復破帽風簷斜先生有意念衰
醜折簡遠送新烏紗束巾試著出妨戶色若露洗凌
晨鷓舍人樣好信殊俗朽質得此慚無涯白癡稚子
強解事競道宜稱相謹譁輕寬不但愜當暑掉頭曝
背仍堪誇修容他日奉遊宴便可笑誚參軍嘉從今
旦暮戴公賜閉關無事聊煎茶

遊蘭谿靈洞

朝曦杲晴空宿霧開紛披縈紆度墟曲犖行溪湄
橫橋轉山腰丹堊明招提谿訝覩陰洞欲入愁途迷
流泉暗淙琤噴壑跳珠璣巖根石彩翠映水光參差

窮高上蒼岑支策行欹危林端出紺宇兀與浮雲齊
曾來念舊事歷歷經行時松長向如人今已老十圍
我尚喜青鬢還年未生絲偕遊數君子意擬探平幽
竒諸峰未歷覽寒日還平西同攜下前麓却望蘭陰
歸明年艷陽春更約相追隨當須各努力補屐尋幽
期

題弟茂通斗齋

昔人驕豪自髻髻萬里浪欲乘風破暮年志計轉難
量眼看一州如斗大今君容膝能自安高館不與身
相關作齋似斗意闊達宇量寧妨廣百間足明居世

惟知足寬窄在心非在屋莫言齋小礙人眉清絕坐
銷愁萬斛奉身那用有餘為身穩心安君自知軟褥
傍爐時枕肘不須小帳更低垂釋名小帳曰斗帳也知文室
含無際自有壺公容客地斗齋我已戲題詩斗酒還
當就君醉

寄題錢伯茂致政奉議遙碧軒

君不聞漢時遺榮兩大夫羣公祖道傾京都去塵寂
寞絕繼踵但見畫手空傳圖君今心事能超古早束
衣冠掛神武掉頭不待迫懸車廣受視君知孰愈世
人分著金籠頭或貪微名魚中鈎寧如君脫宦海去

飽看遙碧臨清流似聞遠目增明處宛如畫出城南
句款門何日赴幽期坐挹雲岑爲君賦想當遐矚窮
天垠吟憐修眉濃綠新應嗤爭利推車客不惜青山
碾作塵

寄題何元晉亦樂堂

士生隋塵網窘若囚飛虫思牽黃耳不可得况欲雲
卧聽松風何郎可憐人恥與俗同調不作窮愁懊惱
詩獨抱青山坐長嘯誅茅結屋傍林塘石蘭露菊秋
風香掉頭萬事一不領仰天白眼傾壺觴邈予坐阻
窺幽躅夢到東牕攀綠玉裁詩寄似堂中人爲楷銀

鈞寫高竹

送春曲

春光春光勸汝一盃酒我能爲春作高歌未解春能
聽歌否春歸有底急落盡桃花紅園蹊漠漠野陰靜
鬼葵燕麥空搖風風光幾何時背我忽如客殘絲欲
斷感春心語燕勞勞上簾額我有惜芳意一春憐物
華春來雪裏索梅笑春去悵望飛楊花春歸知復來
奈此斷年別搖楊三月暮天愁鷓鴣一聲芳草歇歌
竟我亦醉一掉觥船空明年待春花樹下放歌擊酒
相迎逢

春融融效李長吉體

天暄地媚春融融
化工點染分花容
東風夜半入香陌
雜樹曉繁爭白紅
蘭蕙根芳翠滴
柳豔明眉輕
翠歷紅顏綠鬢
青春客壺中新醅
鴨頭色殘絲冉惹
愁如織日暮低迷
草萋碧

同姪伯通端杲效盧仝體

一春癡癖門長扃
兩耳不聞鶗鴂聲
不知東南風掃盡
紅紫英行行
點檢桃李徑
但見樹子青
冥冥門前水流渠
照灼鬚眉清
科斗游其間
脚股各已生
渠旁草鬱鬱
草底虹蚓鳴
韻如抽繭絲
幽咽得我聽
念此

瑣細物隨時變音形黃河赤鯉或點額老驥塞默長
羈纓嗟嗟世路真難行

同弟茂通效溫飛卿體

海棠紅歇鶯停歌麥風時候猶清和簾垂葉簌深院
靜赤欄細柳陰婆娑池塘正覺幽事好萍葉藻蔓涵
清波一雙胡燕薇叢外銜得芹泥來補窠

送喬民瞻倅武昌

春風未綠江南草春信臘前梅藥早水村着處是南
枝想見君行被花惱如君久合上華途胡爲半刺猶
題輿奉引未騎沙宛馬佐藩且食武昌魚頻年欣接

游從樂忽手別書空作惡江干跋馬望行艫日暮山
寒雲錯莫往聞南紀百戰場腥風殺氣吹湖湘只今
江漢俱練靜棹謳雜發行連檣君從鸚鵡洲邊去歷
歷遙看漢陽樹莫言槌碎黃鶴樓準擬書來寄佳句
送徐履之倅南昌

春山罨畫春江平江頭春船椎鼓聲鍾陵別乘喚帆
席笑看獵獵風搖旌明朝太末經行處懸愁望斷煙
綿樹勞勞檣燕亦留君且共推蓬話情素鍾陵地雄
古名都美官况復稱題輿看君逸足展夷路逐電追
風萬里餘前知按部勞綏撫算算行濕西山雨君家

孺子有遺臺試向東湖聊訊古蘭陰新漉酒吹醅更
折江花勸引盃聖代興廉訪良吏遲君却抱鶴書回

六笑

我笑支道林遠移買山書巢由古達士不聞買山居
我笑賀知章欲乞鑑湖水嚴陵釣清江何曾問天子
我笑陶靖節自祭真忘情胡爲托青鳥乃欲長年齡
我笑王無功琴外無所欲當其戀五斗乃獨不知足
我笑杜子美夙昔具扁舟老大意轉拙欲伴習池遊
我笑韓退之不取萬乘相三黜竟不去觸事得讒謗
客言莫謾笑古人笑人未必不受嗔螳螂襲蟬雀在

後只恐有人還笑若迴頭生愧不能語嘲評去聲從今
吞不吐譽堯非桀亦何為訕周譏禹終無取

讀楊子雲傳

老不曉事楊子雲綴文譏訶堅逐貧班生曲筆甚假
借謂不戚戚元非真草玄欲作後人計投閣自迷身
不利王涯筮中好其書寧復逆知甘露事蠅聲紫色
欺昏童義士遠引如冥鴻胡為顛眩尚執戟美新屈
首稱臣雄嶠山沃野蹲鴟大拓落不歸良已過近危
竟似井眉瓶虛作反騷嗤楚些詭情懷祿遭嘲評但
用筆墨垂聲名文章要亦千古事久矣法言今正行

讀王建射虎行

我讀射虎行感慨興長歎官羌射虎得虎難山下遠
立常空還惜留猛虎著山裏射殺顧恐終身閑有如
邊將圖偷安遵養時賦容其姦翻愁努力盡高鳥良
弓掛壁無由彎君不見劉巨容高千里留賊自資媒
富貴恐賊盡誅身不利坐令屈律裹頭入橫暴九州
狂螫噬嗟嗟忠臣心不移受刀摩頸甘如飴紛紛血
刃勇不顧一死未謝君王知官軍壯志吞蠻夷匈奴
不滅寧家爲相公誓欲平淮西慨言賊在歸無期霍
公裴公今已矣我吟射虎徒歔歔

冬夜有感

宵長倦觀書掩帙起微步徘徊簷隙月點綴竹稍露
寒空頑無風寂歷鴈時度不知何處村尚急野塘岸
哀哉當丙夜取水窮沮洳得無空魚羣一舉不復顧
那知今竭澤無復魚可捕天公仁百物暴殄天所怒
褰裳欲從之告以盍長慮浮雲暗林野恐隨荆棘路
出門還入門此意定誰喻遣興強微吟淒涼不能句

送兄茂瞻機宜之官廣東

時年十七

黃蘆鬣鬣秋風肥鬼雨灑草南山悲長塗客子動愁
肺往往捫轍多思歸我兄豈不感時節東床卷席將

何之自言南州有元帥標鑿本是陽秋皮薦紳奔走
欲定價一見許我竒男兒提撕表奏置戎幕使我坐
握官機宜高生所媿國士知不辭觸熱向武威我今
去路雖千里敢以驅馳負知己南州最盛有京都昔
人欲語停盃餘地靈孕秀多異產籠皮蚶蟾如蟲蛆
舊聞民俗蠻頑甚蜂屯蟻雜難爬梳聖朝神化與換
骨詎事草薶髡根株我兄智囊載大腹撫俗自應才
有餘腰間長劍生銅吼可膾蠻王快屠狗後當歸路
持旌麾六印黃金大如斗

贈青城道人

道人來自青城巔飄飄逸氣凌雲烟青鞋布襪久遊
世踏盡海宇名山川琴心三疊得妙旨華頂一路通
幽禪自言早歲拾瑤草往往鶴上逢真仙惜哉食服
只半劑猶與人世相周旋曾期汗漫九垓外決去已
復揮騾鞭伊予此生一念誤遂隨塵網嗟拘攣鏡中
華髮已疎索肘後丹經猶弃捐三山銀闕眇何許悵
望碧海波翻天因君告我獨往意伎撻竦踊心茫然
莫言得道兩塵隔蓬島只在拄杖前定知後會君刮
眼看我玉練還頽年

理喻

郵亭羈客寒無擅夜懷家山情惘然燈前坐感雨蕭
瑟浩歎達曉愁無眠鄰翁不出蓬茨裏聽雨聽風心
似水黃昏鼻息已雷鳴往往簷喧不經耳愁霖一種
聲紛紛鄰翁不聞羈客聞是中轉物有妙理起予暗
契瞿曇旨

我眠鼻息鄰家驚耳不自聞齶齶聲我耳忽鳴韻清
磬旁人對面那能聽耳鳴如心念鼻息如已過心念
潛萌衆莫知已過自迷人看破歷歷眼前皆要理舉
世何人無鼻耳

雜興四首

水母雖目蝦竟自了無覩如人心苟盲記誦亦何補
當須見精義一覽洞千古可效章句徒冥迷自聾聵
乞火固得火不如鑽燧多寄汲非無泉鑿井泉盈科
君子貴自得顧豈求之他心焉有餘師奈彼自弃何
飢人嗜敗肉渴者甘腐漿一為飢渴害食飲俱失常
况茲方寸間邪欲紛難量微哉此心害禍甚飢渴傷
昔人稱水淫好潔若無奈居然一日間洗滌十餘過
君看七尺軀孰與此心大洗心儻亦爾會絕客塵沈

聽琴

坐人皆聽琴未必知琴音相知紛滿眼未必相知心

知音如子期，知心如鮑叔。此道久寥寥，誰其踵高躅。
古聲勿復彈，古心徒自憐。知音惟月露，知我其惟天。
君不見，只今人情如紙薄。只今世路如溪惡，咄嗟許
事不足論。鳥跡微茫，度寥廓。

寓居寶惠寺喜晴登山

喜霽出招提，愛山登葉岌。林端已殘照，路草猶半濕。
丹崖斷雲歸，翠竇飛泉入。長天沒鳥影，遠水動虹吸。
塵襟得必瞰，爽氣橫來集。欲逐野僧還，更看空翠立。
次韻姪端方過予偕行南村翫月

焚魚共酌田家醴，歡酣遞嘯涼風起。子諳懶妝故相

攜指點村南聊縱履行行林影搖參差杖扶我長
過眉幽尋極眺不知倦路轉石角時鈎衣泉聲入耳
淙瑋玉何許泠泠砧杵續悠然發興見南山林壑盤
紆如岳麓喧卑迥隔區中緣况復華月升東邊明凝
苔露正皎皎淨映石瀨彌娟娟方欣清景多幽事揚
輝莫遣浮雲蔽絕憐螢影巧自持却厭蛙謹苦無謂
歸來阿朗傍隅趨示我長吟意有餘明宵有月更相
就還看玉輪遊舞雲

送四兄茂安之任永嘉

不齊宰單父廩廩德垂久當年誠化洽誰忍輒欺負

能令夜漁人有得棄不取何因政乃爾賢助則多有
東嘉侔洛師雅號士淵藪儒風旣純古俗習自忠厚
兄行試牛刀豈復勞決剖鳴弦會多暇遇事無掣肘
懸知著嘉蹟遠與宓生偶匪謂得聲榮期兄富師友
次韻姪端臣雨晴出郊

雨中爛熳睡門徑橫林扉朝暉入甕牖起我聊伸眉
良遊眺江郊攬袂風披披平瀛漲新綠灑漾搖晴陂
雲巒靄空翠煙樹森華滋潭漁下罟麗隴種行樓犁
貪穿康樂屐更杖原思藜阿宜倦遊還心事嗟多違
新功在琢句非復吳下時淵明賦歸來今是知昨非

君看古賢達茹草甘長飢悠悠身外事凜凜曾中竒
因賡喜霽作用代城南詩

送袁上人還銅山

上人眼睛黃游藝出天悟曾中七曜曆掌上九籌數
通醫詔百藥襲氣了三住餘猶窮衆術辨口劇河注
誰云不拘教心實謹律度提攜木上座白足勤遠步
丁丁豕郊扉起我曳塵屨高談翠竹法時覓碧雲句
語以止軻書竦踊知詠慕南山古花界可隱玄豹霧
挽使小淹留懷歸錫難駐長途雪沒脛栗烈正寒沍
披披拂風袖笑話巖中趣巾瓶到銅山鍾梵歲云暮

浮雲亦何意南北自來去遲爾青春深過予碧溪路

范香溪先生文集卷之八

范香溪先生文集卷之九

寄題餘姚嚴公堂

漢家蒲車邀客星嚴公高舉鴻冥故人作帝且不
屈肯復俯首趨羣卿姚江知是公卿聚鄉人尚敬陳

山墓

嚴公墓在餘姚縣陳山

寧須封鬣卧麒麟古隴荒涼名自

著徐侯健令聊弦歌草鞠犴圉庭張羅作堂縣圃得
面勢正見列岫青峩峩堂名不為遊觀設標榜嚴公
仰前哲令方冰蘖事清修日企陳山思砥節世人慕
貴不足論下馬泣拜汾陽墳今但望釣翁塚好尚
與俗真蘊薰往聞范公當守睦嚴瀨奉祠初結屋至

今壓水抗軒楹高椽簷牙映喬木此堂徐侯能始基
後來繼者知為誰聖丹他日儻漫患補理勿廢茲良
規

歎旱 時年十八

我行田間歎且驚田間旱塊絲縱橫荆榛惡草亦枯
瘁雖有稷黍何由生田邊老人為予語欲語先愁淚
如雨老兒百指住山西世業農桑不工賈年年此田
收好穀玉粒長腰春百斛公私取給有贏餘作飯為
糜肥口腹今年旱種良辛苦抱甕澆畦寧入土困傾
舊穀已無餘新穀疎蕪復如許年年百指無憂畏今

年百指俱憔悴餓死填溝自不辭只愁逋負官家稅
即今官稅催輸入督吏臨門如火急老兒可是樂徵
呼其奈黍頭無一粒我感翁言情激烈却笑老翁言
太拙為陳 天子有深仁子惠窮民念民切況今官
府皆時賢會將租青都蠲捐庶幾儉歲亦得飽且與
爾曹圖醉眠

戲贈蜀僧清鑒 六言

西川有一鑿子非銅非鐵非鉛不假江心百鍊自然
本體精堅從來無臺可安瑩磨拂拭都捐歷歷森羅
萬象豈分胡漢蚩妍旁人不敢窮窺照渠肝膽懸懸

東來吳越萬里依舊虛明湛然識者知爲法寶不識
酬之幾錢泥塵埋沒不得光透三千大千

讀長門賦

阿嬌負恃顏姝好那知漢帝恩難保一朝秋水落芙
蕖幾歲長門閉春草自憐身世等前魚舊寵全移衛
子夫獨夜不眠香草枕東箱斜月上金鋪曉驚永巷
車音近失喜疑君在瑤軫臨風望幸立多時却是輕
雷聲隱隱年年織女會牽牛百子池邊侍宴遊自從
一落離宮後無復穿針更上樓長記髫年聘時節愛
深金屋寧衰歇而今遽學冷如冰不解向人佯暖熱

愁看空樹集珍禽孔翠追飛鷺鳳吟顧步深嘖生悵
望伊誰一為迴天心人言消渴臨印客天下工文專
大冊黃金取酒奉文君願悟君王賜顏色賦成果得
大家憐鳳背煎膠續斷絃不似昭君離漢土一生理
沒犬羊天

上李舍人

李侯半天霞絕俗幾千丈平生有勁氣傲岸力高尚
波濤驅筆底萬里一奔放清風凜鬚眉挺拔舍人樣
蚤以鴛鷺姿造羽邇天仗拖綬奉朝請論列專靡讓
言辭劇酸灼貶竄辱傷謗官資如馬足曾不興怙悵

東坡先生集
宴遊長笑傲忠鯁期自諒江山窮賞目搜抉歸吟唱
于今富篇章態度難悉况精清極孤高麗雅略談浪
乘豪騁雄怪句法時跌宕端如撫良琴杳默變清亮
連篇時諷詠殫寢每輒忘我慚語俗下有類牛鳴鴛
遽耳咸池音吟魂驚沮喪聞之良匠氏侏儒非冗長
醫師兼百藥馬勃用或當微言出堂下挈手煩叔向
倘許揖戈鋌願奉詩壇將

送徐彥思倅建安

君不聞詩人一席眠
篷筦夜泊建溪微
月中猶能即事慰
岑寂隔簾朗詠看
瞳矐今君笑擁筭
篋去正有

繁花明驛路修程百越渺風烟發興自應多麗句知
君蹕越是名流朱紱聊煩佐上州貳政少安郎罷困
却登要路贊皇猷西風略略搖征旆過往題詩援
離袂武夷鶴膝杖扶羸寄我他時訪松桂

擬李太白笑矣乎

笑矣乎笑矣乎交情貧富古已殊翟公底用門間書
爾真自爾我自我囂然將奈吾何如笑矣乎笑矣乎
世人那得相賢愚是非正用一理毆目光莫着牛背
上但付捧腹聊盧胡笑矣乎笑矣乎是生百歲猶遽
盧勿謾辛苦愁其軀丁年無事且須醉可恃華髮傷

頭顱笑矣乎笑矣乎馮歡悲歌食無魚少陵老跨東
家驢寧如三高飽斫鱠坐嘯一舸凌烟湖笑矣乎笑
矣乎相隨出關漢兩疎散資千萬荀隱居彼皆棄置
慕閑逸得閒何乃翻區區君不見向來熱手勢莫俱
側肩羹沸權門朱又不見元家胡椒八百斛石家水
碓三千區只今人骨久已朽空餘古塚號寒狐

龍游吳宰因勸農過寓居

令君剖劇久推賢人謂賢如百里天最續已優恩已
洽訟堂無事日鳴絃

夙駕勤民力勸耕肯停車軌訪柴荆誰言羈旅知交

態君似春風不世情

阡陌東西馴雉鳴
陌頭父老望前旌
爭言字我今三歲
真是冰清見底清

雲根仙館駐鳧飛
倚閣遐觀笏拄頤
但賞春山多勝事
不知桃李被恩私

龍游王丞相過寓居

邑丞族望邁平韋
謙槩能過白板扉
應是德門流慶遠
清芬今復繼烏衣

能事知君不負丞
况逢令長著賢聲
同心坐了公家事
那肯空書紙尾名

君家丞相世豪英，字畫文章不朽名。
盥手何時披墨妙，烏絲欄上看真行。

王丞相欲以其祖荆公墨蹟相示

四月一日偶成三絕句奉勉諸友

麥風澹蕩氣清和，又見陰陰夏木多。
試問社中同志士，經春舉力竟如何。

日正舒長好着鞭，會須聞早暮高堅。
君看少壯荒嬉子，多向衰遲却諱年。

讀書意緒戒荒蕪，要使心清一事無。
過眼飛光流水急，莫矜頤頤始生鬚。

送李國佐還三衢

昔人好與勝已處今世陋學多專愚惜哉計出柏馬
下往往自足令人吁子今年少且競爽徑拂歸袖真
良圖人言十步有茂草行矣求益無躊躇

送趙安伯縣丞之任婺源

邑丞清操如臞儒人言帝宗千里駒燃膏夜絕學更
苦下筆欲命騷為奴往年給札試西省堵墻學士紛
驚呼歸來汀草亂袍色上食日向庭闈趨君家先烈
今誰如江州黃州忠義俱綠林豪客為蒲伏刮腸洗
胃投戈爰我方三歎揖盛事欲紀勁節慚才蕪君其
努力濟世美倘登要路須捐軀春流起梅花芬敷取

別草草如驚鳧君逢後日南來客莫忘書札貽潛夫
凌霄花

栽松待成陰種漆擬作器人皆笑艱拙往往後得利
君看植凌霄百尺蔓柔翠新花鬱煌煌照日吐妍媚
風霜忽搖落大木亦彫瘁視爾托根生枯莖無殘蒂
先榮疾蕭瑟物理固難恃凌霄亟芳華衰歇亦容易

題武康唐伯南掃月軒

竹影掃秋月乃是仙人詩至今幽隱士想像沙塘陂
開軒笑長風坐看山月吐修篁出清姿會作婆娑舞
莫遣兒輩覺此樂無人知誰家復多竹風月同幽期

幸當語竹弟俗士久睽闕主人倘無嫌為掃石上月

寄題鄭亨仲可友亭

鄭君坐交窮結柳窮不去無朋長獨立老大荒村住
荒村掃人迹取友惟西山當應愛山標可望不可攀
牽蘿架風亭截薛揖高調修簷入危碧阮眼坐相照
嗟今輕薄子對面生九疑寧如友真山貞質終無移
憐君意超超愧我勞勿勿未共結交心漫負心脾骨

四睡次三兄茂載韻

門外啼鷓暗柳濃華堂翠幕度香風流鶯不識夢魂
遠自向窻前訴落紅春

水亭珍簟卧瑠璃日暮凉生小雨催誰刺蓮船過前
渚榜歌聲落枕邊來

夏

小窻卧冷聽吟蛩半擁輕衾乍怯風清夢不成空有
恨蕭騷疎雨打梧桐

秋

滿面風霜道上兒箝銜口角甲生肌幽人只有高眠
興雪擁柴門了不知

冬

暮春病起絕句二首

病起春深白晝閑瓦松花老掩柴關坐調心息無浮
念沉水烟銷古博山

老去長閑百不營推書習靜更眞清西窻日脚籬篩

動時有飛虫撲紙聲

浦江華藏寺如勝上人欲募施者開田佐僧供
以長老皎公書來求予詩作二十韻奉勉

浮圖謝朋親屏跡藏巖幽多規脫徭賦豈必皆禪流
自言佛遺經墾土爲愆尤不耕徒穀腹何異鼠雀偷
告之勿浮食當須力鋤耰前修舉鋏事千載垂風猷
奈何啞羊僧百語不領頭皎公老禪伯雅慕吾孔周
其徒有如勝用意非常儔欲開千畦田更辦兩具牛
率彼枯木衆躬耕食其秋釋門有添丁乃翁坐無憂
與國助耘耔疲忙庶其瘳此志良足嘉感之歎綢繆

昔聞白黑衆十萬俱清修鳩金置千畝給供無時休
于今豈無人勝也當尋求長途觸隆冬一衲寒颼颼
朱門立雪久歡喜無生愁作詩勸勇往以俟歲晚收
郊行探春得梅林攀玩爲樂因成詩示偕行

公不見白衣居士春風裏浪走尋芳南澗底要見深
紅躑躅花不辭辛苦行三里吾人風味復不惡異代
幽情敢相擬故穿密竹過山腰却下橫橋度沙觜寧
甘著脚踏殘雪正欲搜春訪桃李天寒桃李都未花
只有山梅破紅蘂低歌巖石俯蒼翠倒影方塘照清
泚臨風三嗅忍迴頭細看長吟聊徙倚牽花及此當

作意歸把疎香泛浮蟻莫令標落亂飛空惆悵殘英
隨隴水

次韻樓仲輝郎中游天王寺登城晚歸三絕句
燿燿城頭五丈旗萬人輦土事增陴念當拔白俱登
守恨乏驍雄濟一時
春來物色已爭妍梅柳低昂古道邊放步徑從蓮社
去逃禪要學飲中仙
歸路行吟慘夕風愁煩聊遣酒兵攻也知念國髭鬚
白不忘朝廷醉眼中

次韻姪端臣感興

日車走長天劫劫不容息坐令韶稚子面有凍梨色
崎嶇百年內貴賤俱物役獨往屬幽人膏肓嗜泉石
伊予真愛山所向留履跡遙岑難歷脚望望憐寸碧
阿卿昨遠遊厭俗眼常白歸來對家山隨遇有餘適
哦詩洗窮愁感事念今昔婆娑碧溪上俛仰欣自得
應嗤曩行路萬事等兒劇相期從此始幽賞且連夕
次韻婺守林懿成檢正游赤松絕句四首

寶積峯前露朮香使君行旆照晴陽佳遊會自希高
躅可是空尋叱石羊

黃堂流化古風還夙駕勤民隴畝間已變呻吟作謠

詠山中那用覓還丹

紫烟仙客古祠堂青士蒼官乞道傍想見隼旟穿翠
帳有人迎路曉騎羊

殿邦政蹟茂堂陰着屐題詩寄意深應有高人陪皂
蓋烟蘿深處得幽尋

次韻姪端臣喜雨

初弦落微月草宇夜岑寂追涼拂桃笙伸欠聊偃息
檐榮忽飛雨散亂銀竹白避漏起移牀青燈暈空壁
曉看蛙入戶時有燕為石是節正驕陽敲煩火雲赤
煩蒸等坐甑百體勞按抑良苗憂稿暴空有庭樹碧

借免抱龜腸猶應困蔬色炎埃今一洗萬井沐甘澤
望歲即交歡寧容須暇隙相逢如得酒醕飲莫餘瀝
送別姚令聲刪定還諸暨

昔嗟九載一相見伊我與君俱賦詩只今又話十年
別襜被可辭同宿期相歡美酒如傾水我歌日暮驚
風起惜君抑塞抱竒才拳跼驂騑垂兩耳漢朝公卿
忌賈生世路古已悲難行如君不入中興用脫帽直
酒來耦耕君馬欲東還語別細雨黃花正愁絕一尊
不更苦留君後日空嗟共明月

示姪

華顛老學似秉燭及壯貴在勤書詩男兒不解事文
筆何異婦女留鬚眉予生早已度弱冠畋漁籍素常
嗟遲爾今年纔十八九着力鑽礪誠當時胡爲講道
率麤滅浪自閑散多盤嬉或時使酒昧檢束怒罵臧
獲驚紛披我旁聞爾作氣勢憐爾放鷲如癡兒人生
稟受性不惡鞚馭要使知高低常時見爾亦遜順頓
以狂藥生尤違便當懲艾悼往失痛戒濡首踈尊卮
專心蓄力玩經筭調護氣術循繩規吾言一日可三
復勿謂浪語無資裨

示友

忍過事堪喜斯言良不欺當須去鉗忌佩服西門章
君看朋徒間契濶多睽離胡不事久要有酒歡樂之
顧於毛髮輕溢惡相嗔嗤平生結情好一旦成乖違
譏呵起交攻醜語剝面皮空貽兩不快呀喘如筒吹
吾聞西山翁棄惡怨用希男子固尚氣何以睚眦為
請君謝犬尾脫略除嫌疑自然鄰曲交耐久歡相持
儻復不自慰君當讀吾詩

送張子經撫幹還臨安幕

一昨睽離五換年相逢道舊各欣然已陪文酒四百
刻更得車斜二十篇君家閣老名能賦蓬萊扈遊方

遇主吞曹奪李杜陵翁句律從來付宗武如君才藻
信踰人着帽猶爲入幕賓別去當須自珍寵行看策
足出風塵

送葉彥益縣丞之任江寧

君不聞赤縣詩人書案牘兩衙苦被官拘束自嫌不
辨世間忙猶得吟看縣牆綠今君器度鼎函牛爲丞
烹鮮餘地優更當涿水吳京邑豪士新亭舊勝遊去
追禮樂羣英盛豈復區區勞貳令兩株松下日長哦
會有劉郎五題詠能來取別思依然爲我津頭一繫
船解手看君有知己吹噓高翮上青天

對酒分和杜詩

桃花朱朱李花白高柳花邊出多碧雨中物色更芳
鮮未礙劉郎中一石醺酣裁詩角險麗坐人豪逸俱
勅敵但令得醉復長吟山雲從爾生虛壁

遊赤松觀

靈祠丹井餘真跡祠下老松森百尺仙子騎鯨去不
歸癡人猶問山中石

次韻弟茂通立春四首

物華俱入發生辰喜見花梢刺眼新便好銜盃嚼紅
藥不須枝上火燒春

青青覆雉麥畦肥柳線輕黃拂面垂擬贈物華無麗
句徒慚口業未拋詩

春生稚戲我難同聊復題詩方絮紅忽得池塘夢中
語知君句律有新功

富人百屋看錢堆不省東風幾日來報答春光須我
輩要當劇飲縱歡咍

贈清鑒上人

川勤直下生馬駒早追奔電越國都至今不肯著槽
廠蹴蹋萬里浮江湖我來古寺長松下邂逅解包逢
磊磈尚看秀色帶峨眉墨玉貫珠常在把問今客路

逃風沙得無勞苦行天涯笑言煩惱真佛事去家千里猶吾家休公昔生我鄉曲一併得得遊西蜀鑒今却自蜀中來好住蘭陰結茅屋

寄題趙叔才秀芝堂

君不見邯鄲邑令昔好奇強指金燈花作芝得非美瑞世罕見遂假凡草相漫欺君家聞有真三秀近出高楹照簷雷不須仙客費耘鋤協氣蒸成自榮茂信知為善來嘉祥得此上藥扶年長庭階令子映蘭玉要使如芝冠衆芳

苦寒行

君不見詩人著布裘願得火裘一萬里又不見詩人
歎茅屋願得廣廈千萬間重堂複宇御狐白今世誰
念人多寒我衣穿空垂百結蓬蘿蓋頭四壁裂却顧
悲號窮獨人露宿牛衣冷如鐵

淒涼行

君不見神羊觸邪世不省舞馬應節披華衣又不見
屈軼指佞沒空草合歡蠲忿生庭墀勳華一去幾千
載神羊屈軼令人悲二物不可見我悲何日忘喧啾
聞反舌炎夏亦淒涼

三月廿六日夜同姪端臣端杲觀異書效李長

吉體

楊花亂落青春暮
燕拂簾旌傍人語
縹壺買酒洗春愁
迴風落日簷花舞
赫蹠斷爛千載書
青燈照字驚蟬魚
冬烘老生時自哂
安用盤盂學田蚡

四月十六日同弟姪效李長吉體分韻得首字

黃梅雨歇春歸後
搏黍哺雛鳩喚婦
紅殘小頰蹊上花
翠刷濃眉陌頭柳
籜痕半脫煙篁瘦
露裊幽香逗書牖
雲容漠漠曉陰愁
麥信風前一搔首

偶作二首

晏食聊當肉緩步聊當車
身閑貴莫比心足富有餘

時飲一盃酒歷觀千載書正爾良獨難亦復將何須
飛花拂簾幌亦有關籬墻隨風各偶爾何足較短長
富貴真傳舍易人豈其常寄語窮巷士少安無自傷

狂泉

昔有大荒國水以狂泉名國人皆飲泉狂顛率無寧
一者自穿汲乃獨能常醒國人既皆狂反見不狂驚
顧謂不狂人無乃鬼物憑不然是狂疾救療當痊輕
施針灼炷艾膚肉無全平而彼不狂者被虐楚不勝
賁然走泉所酌飲不敢停既飲即亦狂萬慮皆迷冥
其狂與衆一衆始歡相傾世事今亦然嗟哉感詩鳴

安得跨鵬背獨往遊天溟寄謝彼狂子酌泉吾不能
次韻六兄茂永論有無之作

磨甑不成鏡畫餅不可食談空如畫餅要匪實消息
泥有如磨甑未免見排闥籌量有無中背道費尋覓
先天為心祖此事冥太易空母隋渺茫有勿著聲色
勿同半生滅邪見徒役役萬有齊一虛寥廓鳥無跡
至虛本非無豈謂滯神識佳哉僧肇論妙意真的的
僧肇云齊萬有故
虛曉至虛之非無

己巳十二月廿九日同姪端臣端杲觀王右軍
帖并晉書以白藕薦酒成詩

星回景急歲聿除更長燭明坐蓬廬東風夜半欲入
律萬木先已爭號呼除夕薦藕阮小阮過予足風味
共觀古帖披前志秋蛇綰字右軍書朔馬騰風東晉
記紛紛萬古浩無涯且談白藕傾流霞分甘恨不如
船大空想峰頭十丈花

范香溪先生文集卷之九

范香溪先生文集卷之十

池上晚酌

雨餘池上興悠哉坐蔭藤花藉石苔白鳥聯拳相對
立紅葉粲艷一時開吐吞月色雲濃淡經緯水紋風
去來幽事相關心自樂岸巾獨嘯更銜盃

題雙清堂

市合喧華外堂開磊落明大山橫面勢積水帶渟滌
野靜謹蛙斷林幽獨鳥鳴杜陵詩句在心跡喜雙清

陶潛詠

五箇門前柳千年身後名掛冠真避俗自祭頗忘情

且進杯中物何勞絃上聲詩篇經李杜猶得擅精清

次韻六兄茂永首夏新晴

燕落雨知節鳩鳴天欲晴行雲飛斷碧斜日漏微明
筍上竹三徑苗肥田一成野人知得飽索酒坐班荆

題四兄茂安藏春園

春入名園何處尋

劉禹錫春有情篇云春情何處尋

東風引步上嶠

嶽平凝四面雲嵐合曲折一丘花木深碧草華滋迷
絕徑綠蘿陰影護芳林韶光向此知歸處長與先生
供醉吟

題四兄茂安秀野亭

山作屏風雲作籬
岩堯亭子俯漣漪
絕知此地風光好
直爲主人心跡竒
側塞亂花紅被徑
檀欒高竹翠緣陂
惠連自喜陪幽賞
判却歸時倒接羅

次韻弟茂通晚晴

浮雲捲盡綺霞明
藜杖扶行得晚晴
斜日水邊瀉鷓鴣
影孤煙林外鶉鳩聲
且從樂處安心地
可向艱時觸志兵
幽意欲言言不得
因君聊復動詩情

歲暮喜晴

晴山喜見曉嶺
屹笑出蓬門
不暇冠風掃
斷雲齊萬弩
日融殘雪上
三竿
早黃楊柳漏春信
晚翠枇杷凌

歲寒從此林芳入幽賞凍醪新壓味甘酸

初冬郊行

空闊野雲疎行行思鬱紆露花啼晚菊風葉舞高梧
日落牛羊下天寒雁鷺呼却回南澗路暝色擁蓬廬

遊嚴州景德寺

出郭雨初霽到山雲欲無老松看偃蹇幽徑上崎嶇
佛屋藏巖曲天花舞坐隅向來愁絕意此地一醒蘇

雨後出郊二首

晴景收林靄春郊賸物華麴塵官道柳粉艷野墻花
竹裏草亭古沙邊苔徑邪遣心知有處發興渺無涯

扶輿穿密竹度徇過前溪霽色煙橫野春聲水繞畦
映山行白鷺遷木韻黃鸝客裏貪幽事歸時日已西
登富陽觀山亭

弭棹依寒渚臨亭俯碧川嘶雲征海鴈椎鼓過風船
水闊天低樹山空日暝煙擬題江似練終愧謝公賢
張子經示所得後湖居士詩及書札想見其人

寄意短韻

後湖翰墨真追古前輩風流獨到今二月書題看六
紙一篇詩律抵千金周郎酒裏君相得韋九花間我
欲尋飯顆山頭如會遇殷勤為道仰高心

次韻姪端臣晚行南溪

幽草轉溪路瘦藤扶我行
鯨魚知有樂鷗鳥共忘情
崒翠望中色鞦韆何處聲
賞心成朗詠巢鶴不須驚
課畦丁灌園

連筒隔竹度流泉約束畦丁灌
小園拔薤自須還種
白刈葵輒莫苦傷根瓜疇准擬狸頭大
草徑隄防馬齒繁
努力荷鋤當給酒無令菜把乏朝昏

春望二首

岑樓上獨園高檻俯平原
野秀風烟合春深草木繁
晴山明歷歷遠水去渾渾
興出青冥外心隨獨鶴翻

眺聽不知暮徘徊聊復吟歸雲迷近谷去鳥度前林
長日憑高目傷春望遠心邊方殺氣在天北慘沉陰
讀孔北海傳

歎息東京亂忠推北海豪未容禾女鬼輒代卯金刀
義概秋霜勁英名白日高猶應凜生氣遣恨失吞曹
春雪晚晴出西村

步履尋春犯雪泥村南村北鶉鳩啼隨梅殘白猶明
樹着柳暗黃初映堤風景快晴雲擘絮江天未暮日
懸規最憐碧漲侵沙尾更傍橫橋一杖藜

送周西美主簿之任祁門

君向祁山去修程幾日期江天梅子雨驛路橘花時
知迫循陔養寧辭糾邑卑美才無不適鸞翮豈棲遲
次韻陳叔永山居二首

聞君結屋廬幽意枕山隅剝竹開三徑栽桃課百株
眼根長寂廖音歷心地不崎嶇試問新詩句能窮勝事
無

子方誇小隱我亦愛深居出補登山屐歸攜帶月鋤
旋沽新漉酒聊駐故人車有此幽棲樂雖貧亦晏如

西園

路入西園線綠苔我來倚杖一徘徊霜林有樹葉皆

落風榭無人花自開
奴橘甘酸千百顆
侯梅蕭薄兩三栽
幽人自是便幽勝
終日孤吟只費才

戲效白傅體送姚刪定

倦客長年嗟久客
交游此地喜偕遊
後溪水接前溪碧
小響峰連大響幽
千里家山千里夢
一春風月一春愁
今朝共話明朝別
取醉君無不醉休

避盜泊舟武康遠光亭下與同行分和杜工部詩傷秋及宿江邊閣二首

帶郭人烟少
通村徑路微
水光浮棟宇
野色動窻扉
小樹無重數
前山不合圍
艱危鄰虎窟
奔迫詭牛衣

白舫竟何適丹楓看即稀西園小茅屋知復幾時歸
客子舟維岸人家樹作門西風秋慘切南鵲夜飛翻
惻惻驚心折鞵鞵戍鼓喧若爲容足地廣大自乾坤

遊南山晚歸二首

樂事愜幽討閑情便舊遊梳風修竹晚掛日老楓秋
一飽桑門飯百忘塵世憂蕭條茅屋下可以縱冥搜
荒荒日已暮迴首興何長把耜紛乾穉森疎嘯折篁
水枯山石露風晚野花香歸卧前簷下詩成小雨涼

賀長兄茂寬賜緋

褒功傳紫詔錫服下丹墀朱紱榮書記銀章付拾遺

鳥鳧隨步趾象笏映鬚眉更卜垂三組它年佩陸離
李修撰哀輓二首

三朝推舊德四海仰高名起起方驚夢嗟嗟忽奠楹
木冰傷達宦薤露寄哀情矯首西山下懸河淚已傾
公欲攀琪樹天令墮玉棺生前紆白艾身後跨青鸞
令子清規在遺書舊墨乾英靈今已逝千古一長歎

冬日行蘭谿道中六言二首

雲頑欲雪不雪梅凍將花未花荒草狹蹊山路斷橋
流水人家

瑟縮鷓鴣栖古樹聯拳鷺立回塘水際風低白葦隔村

時見牛羊

忘言示曾仲思

范叔初非辯士曾子本同道入歡伯解兩家難忘言
一笑相親

春日行蘭谿道中六言

遠草連雲碧積繁花照日紅
酣信馬貪看春意不知
錯過村南

次韻弟茂通郊行見梅

好風催冷蘂上番即芳葩
春色獨先得年芳誰復加
日邊看暖艷雪後識真花
吟翫歸來晚江村月照沙

次韻姪端臣七夕

萬古東西隔女牛
停梭期會豈悠悠
蝦蟇蠶輪破青天
暮烏鵲橋橫碧漢秋
莫放癡兒懽徹曙
且容老子強登樓
舉瓢更取天漿酌
一洗胷中萬斛愁

贈光上人

道人工小筆
梅瘦竹嬋娟
更學有聲畫
不叅無眼禪
一枰聊復爾
七馬獨超然
為足前年句
真成續斷弦

上人往者訪予出示李伯時所畫七馬仍求予詩嘗坐上口占六句今復來求足前篇因續成四韻故云

張生夜載酒相過

夜卷一鈎簾
衣寒覺露霑
未驚風割面
且看月磨鎌

玉椀鵝兒酒花瓊虎子鹽張公雞黍舊歡笑了無嫌
幽居

幽居長杜戶竟日少來人花動蜂兒去簾垂燕子嗔
脫巾慵不整得酒醉仍頻養拙風塵外吾寧愧此身
寓龍正次韻六兄茂永見寄

夢想常懷兄弟賢何如合眼到東川客居自幸貧無
事歸計猶須大有年一丈席間方隔闊萬金書意要
頻傳詩筒更喜如飛鳥願乞去聲清新一百篇

姪端旻示遊浦江花藏寺詩且道皎老相問意
因次韻併煩為簡皎公禪師

子到祗陀舍經行幾屐穿想當吟出月不奈思如泉
真界飛花雨寒山落木天皎公知好在香室夜安禪

次韻三兄茂載偶成二首

自笑踈踈走海邊棲遲已與俗相捐誰憐乞米問盧
老懶以無薪告仲連案上三盃朝不飽膝頭一榻夜
驚穿詩人未用生羞澁尚覺囊中有一錢

君看如絃死道邊由來忠髀世人捐劍除佞士朱狂
直笏擊姦臣顧少連莫以古人蘄薄俗空嗟膏軸運
方穿齒牙枉插於菟口見說官家廢料錢

送歐丈朝請赴闕

祖道春風外傷懷野水濱親盟丈人行才力棟梁臣
好去鞭高足榮期據要津人言宣室召未棄賈生貧

春飲分章字韻

傳盃行美釀擊鉢課名章月借全窻白花分小樹香
人情歡不盡道術醉相忘雞黍襟期厚渠論漢范張
次韻富修仲見贈二首

故人欣面欸令我得眉伸意有千金重詩無一字陳
清規看後裔賢業想前人會續安邊策何當謁紫宸
幽棲長懶放野性耻浮沈避俗真成僻居山恨不深
感君來辱意契我願交心但愧瓊瑤贈才枯欲嗣音

過嚴州烏龍嶺

何年龍脅破鱗皴應是風雷役鬼神
曲折鑿開南北路去來老盡利名人
秦雲楚樹青天外禹穴胥山滄海濱
下視蓑城如掌大市聲啾唧暗紅塵

次韻翁承之見寄二首

人情巖險推車路世事變遷鳴屐廊
自分北宮長糲食懶從東壁借餘光
林廬雪後梅含白籬落天寒橘孕黃
幽意只應君共醉何時拂石對傾觴

伊我索居吟雪屋懷君獨夜步風廊
語離尚憶三春暮共醉曾分一日光
忽喜斜封書絹白更傳妙語色

絲黃遙知發興虬松下白眼看天自舉觴

懷曹宗臣併寄

閉關自喜脫愁籠未愧柴桑避俗翁黃嬾引人千里
夢青奴借我一窻風綵葵紫蓼園蔬課白葛朱藤野
步供尚想故人懷別久論文安得一罇同

次韻姪伯通歲暮即事

世情分付與東流含梗徒勞百念浮但使心源長寡
欲便知樂地本無憂處身忌作燕巢幕脫事要如鷹
掣韝節臘好同營一醉幸逢開泰戢戈矛

悼致政樓少師

雅望題輿早已賢高風晚歲更超然笑收劍佩遺榮
路獨往山林事引年行馬正看光梓里卧麟忽歎掩
松阡鄉州耆舊今垂盡忍見山頽重涕漣

身後儲休世或同生前有耀孰踰公班衣五采樞臣
貴寶帶萬釘天眷隆終始哀榮時共羨丕楊寵贈會
追崇遙瞻素旆愁雲外慘愴悲歌立晚風

寓居蘭谿地濕卧病

病怯簾疎雨到床雨餘山靄上衣裳宵攜冷杖強看
月曉傍暖簷貪向陽禦濕要須謀日飲乏資深恨值
年荒所須藥物真吾事麥麴山鞠音今滿囊

次韻姪端臣同遊藏春園

探春着屐犯榛荒更入名園轉曲塘紅認蔬畦憐小
甲白尋梅援得幽香全同花下迷山簡只欠池頭語
葛強吾土信多行樂地絕勝酒裏到家鄉

詠東山

烟嶂巍巍列翠屏松山高下鬱蔥菁風生萬壑笙竽
觸擬向林間築小亭

次韻姪端方喜雪

川原恍若白崖天屑玉輕明瑞有年折竹掀轟宵暗
積欺梅艷溢曉相鮮當知破耳衝風出未似蒙頭正

晝眠杲日能憐有貧者不須更作寄天牋

送王大聲

腹藁才名第一流只今偃蹇困吳州牛腰但使詩章
富鶴髮寧論歲月道恥傍朱門隨掉尾獨尋青筇釣
查頭知君高勝如松竹不遇猶爲蕭洒侯

三兄茂載燕兄弟預者六友宜盡觴詠之樂長
兄茂寬有詩因次其韻

南北東西遇合疎偶然良會足歡娛豹胎供饌片魚
婢雀舌試湯分酪奴花萼成詩多共賦竹根有酒不
須沽借令六逸無人畫也勝當年九老圖

長兄茂寬有寫作蘭

汀六鴈圖
之句故云

范香溪先生文集卷之十

范香溪先生文集卷之十一

策略

臣聞古者天子聽政使公卿列士獻詩以諷近臣盡規親戚補察下至瞽矇百工商旅庶人皆得以進諫傳言非議其上而莫之罪蓋以為腹誹之憤甚於指斥目語之譏切於面謗與其壅天下之言以自欺不若用天下之言以自治傳曰防民之口甚於防川臣請借秦以言之始皇不道劉愼自用進導諛斥忠諫強直者謂之罔上讜論者謂之妖言威之使懼劫之使嘿天下之人不得一申其喙積忍含怒不勝憤鬱

不平之心戴目傾耳思一快其懟悶而無由及一夫
作難奮臂大呼則靡然響動相與裂憲網壞禁防聚
首族談爭詆秦罪搖吻鼓譟而莫之禁蓋其所以壅
天下之言者甚固而無所洩則其發也若大川之決
齧提四走奔湧浩蕩遂至於橫潰而不可制此甚可
懼也惟人君博詢廣聽來衆言以宣下情使無所閉
抑而不通則可以自安於士民之上是用天下之言
者人主所以自治也仰惟陛下厲精庶政虚心聽納
乃以太陽有異氛氣四合亟下明詔敷求讜言是將
用天下之言以自治故臣於此先陳人主之說已乃

極言其餘惟陛下財察臣聞主道在先正心正心所以自治也心不正於中則過事形於外天下之人因得而議之故用人言以自治其要莫切於正心然而君臨兆人總御萬機事物之日投於前衡於慮者交午不可計欲心之正豈不難哉唐太宗嘗言人主惟有一心而攻之者甚衆或以勇力或以辨口或以姦詐或以嗜欲輻輳攻之各求自售以取寵祿人主少懈而受其一則危亡隨之此其所以難也嗟夫一心而攻之者如此其衆可不思所以正之乎昔孟軻三見齊王而不言事曰我先攻其邪心而其說則以謂

人不足與適政不足與間獨在乎格君心之非而時
君類以爲迂遠闊於事情不能用漢董仲舒嘗以正
心爲武帝言之唐柳公權又嘗以正心爲穆宗言之
然皆不能用也是豈人主之心果不可正乎亦曰習
與正人居之而已左右前後皆正人也則聞正言見
正事行正道欲其心之不正胡可得耶陛下能正心
矣則判忠邪察賢佞如辨黑之與白如觀高山之與
深谿於以聽言洞然不惑然後臣之區區得以上達
臣抑嘗觀仁宗嘉祐中司馬光建言國家本置六科
蓋欲以上觀朝政之得失下知元元之疾苦非爲士

人設此以爲進取之階也因請取制舉所試策擇其
言合時務者行之使四方知朝廷求直言之士非以
飾虛名乃取其實用光意若以謂國家於進士科外
復設六科正欲求言儻略其言不加採用則雖制舉
猶無益也况今時方多艱陛下又以天變詔求直言
使草茅賤士皆得論社稷之至計可不留神審覽哉
夫多言繁稱未必雜而寡要略事陳意未必拙而不
智道往古未必爲誦說論大計未必爲夸浮質言未
必鄙小談未必陋乖於時未必繆忤於衆未必非從
宜而言惟歸于當惟陛下擇之而已

應天

臣聞天人相與之際其道甚密其應甚捷其成敗甚可畏方天之仁愛人君也先出災祥以譴告之不知自省又出怪異以警懼之猶不知畏有所塞除而輕忽簡誣傷敗迺至是知非天心之所眷顧則無復變異以示戒于下此譬猶父之於子有所甚愛故繩違糾過丁寧教告惟恐不為善人之歸若聽其逋蕩墮游肆行不義子不何斥如塗人然是不外而不戚以為不足復子也楚莊王見天不見妖地不出孽則禱於山川曰天其忘予乎是以古之興王天所右與必

有妖孽以恐動其心增益其所未至故太戊之桑穀
高宗之鼎雉宣王之旱虐皆所以轉禍而爲福易亂
而爲治起衰運而治中興然則災異者誠天之深愛
乎人君也臣觀陛下即位以來撫艱難之運宵興求
衣旰不暇食憂勤至矣而變異時見殆天仁愛陛下
昭示至戒以見右與之深夫人情忽不自知失德遺
行出於戒慎之所不及恐懼之所未至者已或不知
之而天獨知之是故聖人寅畏天戒惕慄震動所以
修省而思愆惟恐不至成湯七年之旱煎炒爛石則
自責曰政不節耶使人疾耶苞苴直行耶讒夫昌耶宮

室營耶女謁盛耶何不雨之極也六事皆叔世僻王
悖繆之爲豈成湯所宜有而湯以自責蓋懼夫忽不
自知而天獨知之者也夫人之道不可以無畏子無
畏則忘孝父無畏則廢慈臣無畏則勲不立君無畏
則亂不治人主高居九重螽蝓蠖蕩之中至尊極也
作福作威生殺予奪無不如志苟放情縱慾恣爲不
道如桀紂如幽厲如秦始皇如隋煬帝方其力行無
度長惡勿悛天下之人誰能制之惟其得罪于天加
凶罰而下殃禍故國顛覆身滅亡天下大壞而不救
使後世之君指前車而思危知上天之可畏也然則

人主所不敢放情縱慾恣為不道者亦惟畏天而已
堯舜之帝三代之王凡其君臣所以動色相戒者未
嘗不以皇天上帝為言見於虞夏商周之書可考也
人君其可忽哉臣聞仁宗當慶曆間嘗遇旱蔬食禁
中引咎請禱一夕微聞雷聲遽起冠帶露立廷中至
雨沾衣而不倦仁宗畏天憫民祇懼如此故能享國
久長號稱盛治陛下誠畏天戒則宜法仁宗之祇畏
慕成湯之自責歷算周思政教得無僻違刑罰得無
過差舉事得無失當謹言得無未進賢才得無未用
姦邪讒佞欺負之徒得無未去賦斂得無繁重窮民

得無怨咨凡可以引咎而罪已者無所不慮慮而思所以施置之宜亟正厥事豈不足以弭天變哉昔唐文皇正觀中妖災屢見然而躋世太平治幾成康稱賢君者惟其用人言以應天塞異故不害其為至治當時山東淫雨江淮大水虞世南曰宜錄枉繫帝即申省寃獄多所原赦星孛虛危歷氏百餘日世南曰願陛下勿以功高自矜帝即曰此吾之罪也穀洛溢漂居人魏徵謂無克終之美帝即優納廢明德宮元圃院賜遭水者旱暵不雨徵疏十漸帝即曰願改之以終善道今陛下以天變求言苟可用願陛下即施

用之如唐文皇則雖變異不害夫精祲相感災不徒
生動天以誠無事虛文則臣之至願也

遠圖

臣聞書曰惟懷永圖孔子曰人無遠慮必有近憂夫
天下之事固有患在數十年之後必豫圖之目前乃
克有濟者譬猶越人適秦度塗計遠必三月乃至苟
惟不先時而即路遽欲一旦求至于三月之後則雖
鹿奔鳥舉有所不能此智者之獨見愚者之同昧也
晉武帝每宴見羣臣不聞經國遠圖惟說平生常事
議者謂非貽厥孫謀之道故西晉中否不克久長自

古英主睿君未嘗不深謀遠慮爲子孫千百年不可動搖之計方禍患危機藏於微隱而潛萌於衆人之所不知則已預防而逆爲之所後雖不能盡去其所可憂要亦不至漫漶而遂不可救世言漢高祖識吳王濞必爲亂於五十年後若聖神然此非有竒術怪道以知之也蓋自秦室土崩海內雲擾如滄海橫流無不昏墊而江東故地受兵獨希其人皆剽勇多竒材劍客且未忘項氏易動而喜禍又有鑄山煮海之利足以富饒高祖計後五十年東南益盛必至於亂而濞適已封拜故因戒之曰慎毋反亦欲子孫聞此

言不忘所以備吳嗟夫高祖之爲後世深謀遠慮殆不止此呂后問宰相高祖曰陳平智有餘難獨任王陵少戇可以佐之周勃重厚少文然安劉氏者必勃也可令爲太尉當是時天下未復有患何劉氏之安哉而其意則實在諸呂諸呂擅權高祖微見其漸預爲之圖當付之智者則一陳平亦足矣而猶慮其智有餘使少戇重厚者共圖之蓋智有餘則求成速求成速則其舉也或先事而失機故濟以少戇之王陵重厚之周勃相與維持隱忍以待可投之會卒能一動而諸呂之族赤劉氏社稷幾危而復安然則高祖

為天下國家之計豈不深且遠哉臣觀方今天下之事固有宜為深謀遠慮者民日益困而斂日益繁財日益乏而兵日益聚官日益多而入仕之門日益廣穀日益貴而浮食之人日益衆此數者特為患之細耳故臣得以遽言之抑又有大於此在陛下詳求其故預防而逆為之所務使謀慮如漢高之切至則何後患之有臣聞晉文公將與楚戰謀於咎犯曰彼衆我寡奈何對曰戰陣之間不厭詐偽君其詐而已矣又謀於雍季對曰以詐遇民偷取一時後必無復文公曰善乃以咎犯之謀與楚人戰及勝而行爵則先

雍季後咎犯曰咎犯言一時之權雍季言萬世之利也仲尼聞之曰文公之霸也宜哉既知一時之權又知萬世之利今陛下撥亂用武事出一切便宜者爲多而臣所言亦固有所不得已而應變者至若從一時之權又存萬世之利以盡經國遠圖可不念哉

任相

天子以萬機之得失百官之進退社稷之安危生民之休戚近而號令之臧否遠而蠻夷之叛服大而陰陽之愆和小而錢穀之衍耗凡官有其事事有其名一皆委任而責成於宰相故宰相於天下事無所不

統不以一職名官熙載代工治亂攸繫晷刻之誤或
貽患於歷年毫釐之差或致弊於寰海相之為任顧
不重哉人君於此貴乎考慎輕用而亟易則不足與
共功蓋嘗聞之孔子相魯三月而政成子產相鄭三
年而政成聖如孔子不得而見也賢如子產使之成
政猶須三年况子產不時有乎唐明皇相姚崇相宋
璟開元之治幾致太平希蹤正觀當時輔相率三考
輒去故雖崇璟不能踰使明皇知久任二人不他相
則迄天寶治安可也惟不知出此故卒以危亂而不
克終然其相李林甫遂至十九年不亟去何哉大抵

君子事上率以正正則君所欽而憚小人事上率以
佞佞則君所狎而安欽而憚則易以踈狎而安則易
以昵踈故崇璟三年而遂去昵故李林甫十九年而
猶處中夫惟惡小人而亟去親君子而久任者非聰
明睿知之君有所不能李德裕戒武宗以亟進罷宰
相使權在中書誠治本也此言非是觀德裕在相位
以秉權日久位重有功向使武宗用德裕言遂亟罷
德裕則會昌之功亦莫克有就故臣以謂德裕當勸
其君擇宰相不當勸以亟進罷宰相惟能慎擇於其
始則無庸亟易於其後此太宗所以用房元齡十有

六年任魏徵十有五年未嘗失道也然則何以知其可相而任之曰相固自有體不動聲氣而危疑以平相之體也偃息談笑而坐折遐衝相之體也隱然鎮靜遭變事而不亂相之體也一言足以折姦辯使憺人奪氣相之體也唐崔祐甫相德宗時王駕鶴典衛兵久權震中外帝將代之懼其變祐甫曰是無足慮即召駕鶴留語移時而代者已入軍中矣此不動聲氣而危疑以平者也晉謝安相武帝時苻堅率衆百萬次于淮肥遠近震恐安夷然無懼游奕自如指授諸將遂清強寇此偃息談笑而坐折遐衝者也漢王

商相成帝民無故相驚言大水至百姓奔呼長安中
大亂商獨排羣議以爲訛言天子壯其固守此隱然
鎮靜遭變事而不亂者也唐李石相文宗對延英仇
士良等斥李訓以折大臣石徐謂曰亂京師者訓注
也然其進孰爲之先士良等恧縮不得對縉紳賴以
爲強此一言足以折姦辯使愜人奪氣者也即是四
者以擇相其有不得人乎得人矣任之久而不移信
之專而不貳假之權而不疑此則責成之道也

更化

一儀不可以百發一衣不可以出歲儀必應乎高下

衣必適乎寒暑是故世異則事變時移則俗改夏之
政忠忠之失則野救野莫若恭故商人救以恭恭之
失鬼救鬼莫若文故周人救以文三王聖人也其教
化不免乎失失則不免乎救之天下後世不以其失
爲悖道不以其救爲反古蓋久則弊弊則變理之自
然非固相戾爲也傳曰爲政不行甚者必解而更化
之乃可理也陛下中興王業修正百度天下之人宜
渙然洗心易慮以承惟新之休德而士大夫奔競之
風未息州縣苟簡之政尚多民庶逐末之俗愈甚其
故何哉失不更化而已夫作有利於時制有便於物

可守也祖宗之成憲是也事有乖於數法有翫於時
可改也臣所謂宜更化者是也是故士大夫奔競之
風未息由薦舉之法弊也州縣苟簡之政尚多由考
課之法弊也民庶逐末之俗愈甚由稅賦之法弊也
薦舉之法本以明公道至其弊則薦舉益廣而公道
益以不明夫惟士皆求舉舉者初不求士故以朴素
為遲鈍以虛偽為精強以靜嘿為拙訥以捷給為辯
慧以守節為固陋以趨附為疏通以剛介為偃蹇以
佞媚為溫良刻章論薦非蟬聯鳥奕之緒胄則達官
臚仕之姻戚非藉權門之援地則苞苴賂遺之交

關非詭隨趨和之姦人則脅肩搖尾之諂士不然則
雖廉若夷齊政若求由愛惠若子產有聲名若子奇
亦未免徒勞州縣誰其稱之用是希遷望進挾岸媚
竈之徒離局捨次狂奔疾走望塵俯伏以伺候於公
卿權勢之門自非持身秉操毅然不回者孰不心心
覘覘撓所守而靡從之臣故曰士大夫奔競之風未
息由薦舉之法弊也考課之法黜幽陟明揚清激濁
所以總核名實也國家之制諸道州縣官命漕臣察
訪其能否第為三等歲終以聞以臨事簡慢者為下
職務粗治者為中政有殊績者為上吏部給曆書其

勞効愆過秩滿有司詳視而差殿冢法至良也然行之
歲久視爲不急漕臣初不精覈州郡據曆書考殆若循
常案牘吏摘紙尾至則占字選部銓擬亦不加察在官
雖或酷若乳虎或貪若石鼠或冥迷鄙昧不辯菽麥或
筋駑肉緩縮手避事或遨遊沈湎不主曹務曆之所書
苟無愆犯即以資格緣手注授欲官之不隨窳而勤不
賊墨而廉不暴刻而循良不放教而謹守不麓滅而精
詳其可得耶臣故曰州縣苟簡之政尚多由考課之法
弊也稅賦之法民因資產而有兩稅因兩稅而有科率
軍興以來斂取歲增常產之民日以彫窶州縣索一絲

縷市一筋角悉按戶等高下差第敷入無常產者秋
毫不輸蓋有囊金珠束縑素時其低昂取贏貲以自
肥者蓋有困藏廩積乘農人之憔悴賤收貴出坐待
穀直之翔踊者蓋有擁高貲行子貸息取倍稱以朘
剝貧民者是等皆飲醲齧肥朝歌夜絃笑視編氓之
困顧有得色是以溫丁高戶剔屋產市犁犢相與捐
隴畝而捨本業規脫科斂臣故曰民庶逐末之俗愈
甚由稅賦之法弊也此三弊皆風俗之大患宜爲之
變通者而未聞所以革之臣故曰失不更化也

范香溪先生文集卷之十一

范香溪先生文集卷之十二

廟謨上

未戰而廟算勝者得算多也未戰而廟算不勝者得算少也人主議戰於廟堂之上兵形已成然後付之於將是謂廟謨夫形兵之極至於無形無形則深間不能窺智者不能謀故爲魚鼈者可以網罟取爲鴻鵠者可以矰繳加惟無形者無可奈何廟謨成算所以先計取勝出萬全而必無敗蓋無形之大者也豈獨使敵人不能窺雖吾士卒雖吾國人不可使知之非吾腹心之臣非吾指授之將不可使知之易曰君

不密則失臣臣不密則失身機事不密則害成君臣
相與議戰于廟堂之上安危係焉成敗係焉固所以
躡足附耳而謀者也慎密不至幾何而不害於成蓋
聞用兵者常不愛爵祿百金以求知敵之情間人謀
士我固有之而彼亦烏能不用凡彼使之覘我事情
伺我動靜察我虛實固有近在門庭而不及知者我
非故爲誑事於外令吾民知之以欺於敵間則竒謀
至計情實之所在殆未有不密而不害于成者也今
有千金之玉卮通而無當可以盛水乎曰不可有瓦
器而無漏可以盛酒乎曰可也夫瓦器雖甚賤惟無

漏故可以盛酒玉卮雖甚貴惟有漏故不可以盛水
此春秋所以戒寺人貂漏師于多魚者也昔之人固
有欲發天下大事未嘗不獨寢恐夢言而使人知其
謀者固有居高堂悉去屏障相向坐謀而不言以鐵
筋畫灰爲字隨滅去之故其所謀人無得而知者漢
高祖以陳平爲腹心或計祕世莫得聞荀攸從魏武
攻討常謀謨帷幄時人及子弟莫知其所言古之君
臣於機事慎密如此其至是以決策舉事鮮不有成
今廟堂之上沈機祕畫必如漢高之與陳平魏武之
與荀攸則何攻之不克何戰之不勝何敵之不摧何

寇之不滅哉儻尚若異時謀未定而計已傳兵未動而敵已知成算未授于將帥而市人行路已宣言吾情實之所生則非臣之所敢知也或曰得萬人兵不如聞一言獨不可以收羣策廣廟謨也曰是不然兼聽而獨斷者大謀之術也收羣策所以兼聽故白屋之士皆得以關其說定廟謨所以獨斷故非腹心之臣非指授之將不可使知魏劉廙言智周於獨斷者不恥於下問故博採衆智于下而慎密勝算于上聖王所以出萬全也凡臣所陳或妄議兵形則皆發其端而不敢盡惟畏夫機事之不密而已然猶有不得

已而及之者昔唐元萬瑱草檄責高麗譏其不知守鴨渚之險莫支離報曰謹聞命徒兵固守鴨渚唐軍不得入此又機事之所宜密也

廟謨下

所謂廟謨者計勝于未戰尚謀之道也夫天下無久治亦無久亂不患亂之不治而患所用以治亂者非其人苟得其人不患功之不速而患所以圖功者無其謀昔晉元帝啓基江左出師露次躬擐甲冑移檄四方刻日北征至以漕餉稽期誅督運令史志非不速也然終不能成尅復功者惟無圖功之謀而已當

是時祖逖鎮雍丘數破石勒之鎮戍歸附逖者甚衆
黃河以南盡為晉土又營繕虎牢將長驅越河掃清
冀朔元帝既得逖宣威于外儻遂能推誠任之俾專
分閫且以王導為腹心引紀瞻戴若思等為策士倚
陶侃以為屏蔽誅王敦以絕內患因溫嶠忠亮之節
復讎之私俾率銳師佐逖進討則剪羣胡如拉枯復
輿地如反手元帝謀不及此故元戎屢動不出江畿
是雖得人而無圖功之謀猶無功也今王師討伐固
將收中原清大慙以悉復祖宗故地然根本所恃實
在江左彼東晉得一祖逖猶能使黃河以南盡為晉

土况陛下有腹心爪牙之衆乎臣所未知者廟堂所以圖功之謀爲如何耳陛下雖有腹心之臣籌於帷幄然引之爲策士者誰乎倚以爲屏蔽者誰乎俾專分閫可以破虜如祖逖之當石勒者誰乎可使之率銳師佐進討者誰乎陛下當與腹心之臣議於廟堂之上審我徇地闢國者才爲如何訓兵總衆者才爲如何彼所出者何策我所出者何策彼所固守者何地我所固守者何地吾將所以破彼者何人彼所以當吾將者何人孰賢孰否孰智孰愚孰強孰弱孰勇孰怯彼已洞見則勝負之勢未戰而已分矣兵法曰

如彼知己百戰不殆漢高祖深明知彼己之術故伐魏而知柏直不能當韓信馮欽不能當灌嬰項它不能當曹參因曰吾無患矣果定魏地是審彼己之將而知必勝也黥布之反高祖召薛公問以布計所從出薛公對以布出上計則山東非漢有出中計則勝負未可知出下計則可以高枕而卧漢無事矣布果出下計高祖遂破之是審彼己之計而知必勝也陳豨之反高祖自往討之至邯鄲喜曰豨不南據邯鄲而阻漳水吾知其無能爲矣遂破豨是審彼己之地而知必勝也故夫決勝之策在乎察將之才能審敵

之強弱斷地之形勢觀時之宜利今廟堂之謀能先
審彼已知必勝之道則何患功之不速乎議者或謂
唐肅宗以匹馬起靈武合弱旅鉏強寇師及渭西曾
不踰時而摧堅銳復兩京悉收河南州縣今中興之
功胡爲乎不可以日月冀也臣竊以爲不計事勢之
言夫清內盜者易爲力攘外患者難爲功安祿山雖
劇寇然內盜也當時回紇請和土蕃結附不惟順服
又藉其用以復土疆則不踰時而清中原尚爲宿留
且香積之戰新店之戰唐兵爲賊掩幾不能軍使非
回紇相與夾攻則雖郭汾陽李嗣業且將再不勝賊

驚曰回紇至矣因大敗遂收東都是肅宗中興用夷狄國家中興攘夷狄也不計事勢而欲以至德之功望今日則過矣然而功不可以速成者事之勢時不可不趨者人之力苟惟玩日弃時而曰功不可以速成則亦何功之有禹之治水非一日而有功也然履遺弗取冠掛弗顧其於趨時未嘗不急則圖天下之功可忘所以趨時哉

用奇

臣言功難以速成謂中興大功也至於兵家之策則又有貴速而不貴久者臣且將言之夫戰久則兵鈍

攻久則力屈暴師久則國用不足此兵所以貴速也
敵有可乘之隙我有決勝之機行之有疑反爲彼利
此兵所以貴速也欲無鈍兵屈力殫財動敵機會則
莫若用竒以求速勝之功而用竒者又莫神於得竒
正之變也使夫用兵者以衆敵衆以強敵強戰勝則
殺傷猶至於相當不勝則一敗塗地以爲用兵如是
而止耳則雖庸人悍夫皆可以將百萬之師以臨大
敵惟夫用寡以當衆用弱以當強轉危而安轉敗而
勝勝則彼必摧潰而我獨全不勝則不至於甚亂而
敵無以乘我是豈庸人悍夫所能知哉蓋有竒正之

變行乎其間因形制勝神張鬼翕變化莫測雖吾士
卒猶不能窺吾所以勝况敵人乎兵法曰戰勢不過
竒正竒正之變不可勝窮竒正相生如循環無端必
有獨得於心不可以智識不可以情求者為能盡之
昔唐兵之破霍邑也建成隋馬右軍少却而宋老生
乘之太宗自南原馳下斷其軍引兵奮擊遂敗老生
夫建成陣於城北是謂正及其却而致老生則向之
正變而為竒太宗自南原馳下是謂竒及其斷老生
軍引兵奮擊則向之竒變而為正太宗得竒正之變
故戰無不勝攻無不克議者以謂非學而能惟其以

正爲竒以竒爲正吾之正使敵視以爲竒吾之竒使敵視以爲正是豈可學而能哉必有獨得於心不可以智識不可以情求者也歷觀自古善用兵者未嘗不以竒勝或示羸而用其銳或示怯而用其勇或示緩而用其急或示近而用其遠或示之敗而致其怠或示之退而致其追或示以擊東而實攻其西或示以擊左而實攻其右皆因機應變示敵以可見之形而不示以不可知之計唐李泌請肅宗詔李光弼守太原出井陘郭子儀取馮翊入河東則史思明張忠志不敢離范陽常山安守忠田乾真不敢離長安是

以三地禁其四將也然後命建寧王北並塞與光弼相犄角以取范陽賊失巢窟當死河南諸將手肅宗不能用使慶緒思明挺亂不已其後代宗討史朝義長孫全緒請休士張勢以綴賊使光弼取陳留李抱玉擣河北先斷其手足然後縱間賊中彼脅從者相疑則賊滅可待代宗用其言遂滅朝義平河北臣嘗謂禁四將而取巢窟張勢綴賊而斷其手足是皆用竒正之微機不可失者惟有用有不用故或有功或無功夫先人有奪人之心投機之會間不容髮方今討賊之勢得無與李泌全緒所言有近似者乎惟能

出奇正之變示以可見之形不示以不可知之計以成速勝則善矣

揆策上

兵有不可攻有不可不攻不可攻者敵之銳也不可
不攻者敵之恃也我以兵進彼以兵逆則猛士精卒
悉銳來拒此不可攻也當用奇以擣其虛彼有所恃
持重自守則餘軍倚以爲強士氣自倍此不可不攻
也當用奇以致其敗日者王師之討賊也數道並進
賊悉以銳兵分拒諸將諸將攻之勝負未有此攻所
不可攻也法當以大衆謹持其銳選梟勇士少出而

更進時擣壘以撓之備東則擣西備西則擣東使彼奔走不給雖有猛士精卒且將氣竭而力弊我乘其弊而攻之可以必克且彼備我於前者旣衆而強則其自備於後者必寡而弱我旣弊其強衆於前則可以襲其寡弱於後彼強而衆者旣弊則寡而弱者自孤我因以輕兵捷騎投其間而擊其虛倍道疾馳不三日而叩汴城出其不意則叛衆可以笑俘渠首可以坐縛彼強衆之在前者還救則戎師夾攻不還救則腹心已奪此彼之銳不可攻當用竒以擣其虛之策也且賊之所恃者胡虜也彼宜推以抗我爲兵寇

鋒而方蜂屯蟻結固守不動者蓋彼以為恃則其動不敢輕輕動而小衄則凶威挫而賊衆疑恐我得以測其虛實不若固守不動使其衆賴強胡之虛聲挾以自壯且示所恃以疑我此賊人之情也法當以計動之使彼雖不欲與我戰而不得不戰夫胡虜之性貪恠無厭可以利誘我宜未戰而設伏使一裨將率數千衆鼓行徑進衝其中堅示敗而速去之無愛輜重寶物且走且棄虜輕我軍之易北又嗜遺利必驕怠而競為抄掠則吾伏可起掩其不備虜必反走因而乘之向之蜂屯蟻結者必亂則吾示敗之師可還

奮擊破彼所恃則餘賊失氣然後諸將席勝四面攻之大克必矣此彼所恃不可不攻當用竒以致其敗之策也昔唐兵討蔡吳元濟悉銳卒屯洄曲以抗李光顏故李愬知元濟之隙可乘潛師夜起出文城柵馳入垂瓠城駐元濟外宅而蔡人無知者遂以平蔡時董重質猶守洄曲愬折簡召之重質即弃軍降是擣其虛而銳自摧也李靖討輔公柘公柘以一軍頓當塗一軍據當塗南路皆百戰強兵造柵自固蓄力養銳以抗唐軍蓋公柘所恃也靖苦戰破之二軍悉潰公柘餘衆雖多不復敢戰遂禽公柘是敗其恃而

衆自破也擣其虛而銳自摧敗其恃而衆自破固有古事之効矣豈空言哉

揆策下

甚哉兵久之難也千里饋糧內外騷動老師費財從古患之昔曹操孫權時江淮間不居者數百里或以爲坼埃之郊非耕牧之地此未得曹孫之情也且操與權才均智敵將佐亦相甲乙使其對壘抗兵各用所長以角逐於江淮之間雖積時累歲徒爲自弊勝負猶未有分也故各虛數百之地堅壁清野以相候望來則應去則守全力繕兵以伺敵釁此則曹孫之

情也然兵固有不得已而相持者以順討逆以義討不義師出有名士氣自銳彼不敗走我難自却却則我勢沮彼勢張進不成攻退不成守古人於此雖以弱敵強以寡敵衆猶相持也故以弱而持強者漢高之持項籍是也以寡而持衆者曹操之持袁紹是也漢高與項籍相距滎陽數歲漢義而籍不義故漢雖數困而不爲弱然卒所以勝籍者竒也高祖出軍宛葉綴籍兵而不戰令滎陽成臯間得休息使韓信等得輯河北趙地連燕齊因復走滎陽使籍備多而力分此高祖之用竒也曹操與袁紹相持官度有餘日


操順而紹逆故操軍雖不敵而不爲寡然卒所以勝
紹者竒也紹遣淳于瓊等將兵萬餘人北迎糧運操
自將夜往攻破瓊等悉斬之此曹操之用竒也今王
師出征以順討逆以義討不義兵衆將強不寡不弱
固有萬全之勢然賊未敗走理必相持不出竒謀未
見其利臣所謂擣其虛敗其銳誠爲至計然苟未可
圖則宜以諸軍綴賊使不得動別遣竒兵萬人由間
道襲取負海諸郡以駭京東賊徹緣淮之備以自救
則震擾可擊使其終不敢動則我遂盡取京東此亦
漢高之竒也國家得東南漕運故可以都汴京今賊

雖僭據而江淮財用皆為我有策其暴兵既久必至
飢虛儲糧大乏當遣間人用火攻燒其積聚或伺其
積聚所在以輕兵夜出假賊旗幟設詭道襲而燔之
此亦曹操之竒也或謂我以萬人由間道襲取負海
諸郡餉道聲援兩皆阻絕奈何曰是又有竒正之變
焉竒正之變莫妙於變主為客變客為主因糧於敵
是變客而為主也投萬人於死地使自為戰而後生
是變客而為主也因京東思國家之心復其租而寬
其徭使還為我用是變主而為客也已得負海諸郡
俟彼救至乘其恍惚設伏於險而迎破之是變主而

為客也何餉道聲援之虞哉

范香溪先生文集卷之十二

山亦與先生主文其書卷之五十二



112801